


## ԿԸՅ 2017թ. Հայաստանի և տարածաշրջանի այլ երկրների արդյունքները

**Հայաստանի** ԿԸՅ 2017թ. արժեքն է **35** և նա **Եթովպիայի, Մակեդոնիայի** և **Վիետնամի** հետ միասին **180** երկրների շարքում կիսում է **107-ից 110-րդ տեղերը**: Նախորդ 2016թ. Հայաստանի ԿԸՅ համաթվի արժեքն էր **33** և այդ արժեքով նա **176** երկրների շարքում կիսում էր **113-ից 115-րդ** տեղերը: Նկատի ունենալով Հայաստանի ԿԸՅ-ի համար հաշվարկված ստանդարտ սխալի չափը (3.79), կարելի է պնդել, որ 2016թ. համեմատությամբ Հայաստանի հանրային ոլորտի կոռուպցիայի ընկալումը 2017թ. մնացել է մոտավորապես նույնը: Միևնույն ժամանակ, ԿԸՅ դասակարգման աղյուսակում Հայաստանը առաջադիմել է 6 տեղով, իսկ եթե դասակարգման 2017թ. աղյուսակից հանենք բոլոր այն երկրները (թվով 4 երկիր), որոնք ընդգրկված չեն եղել 2016թ. դասակարգման աղյուսակներում, ապա առաջընթացը կկազմի 9 տեղ:<sup>1</sup>



Թրանսփարենսի Ինթերնեշնլի տարածաշրջանային բաժանմամբ Հայաստանը ներառված է **Արևելյան Եվրոպա-Կենտրոնական Ասիա** տարածաշրջանի մեջ (տե՛ս 2017թ. ԿԸՅ համապատասխան տարածաշրջանի աղյուսակը): Այդ տարածաշրջանի մեջ

ներառված են Եվրամիության անդամ չհանդիսացող բալկանյան երկրները (**Չերնոզորիա, Սերբիա, Բոսնիա և Հերցեգովինա, Ալբանիա, Մակեդոնիա** և **Կոսովո**), նախկին

<sup>1</sup> Ավելի մանրամասն 2017թ. դասակարգման աղյուսակում ընդգրկված երկրների մասին տե՛ս **Հաճախակի տրվող հարցեր** կայքում: Հարկ է նշել, որ 2017թ. դասակարգման աղյուսակում հայտնված 4 նոր երկրներից 3-ի ԿԸՅ արժեքները գերազանցում են Հայաստանի 2017 թվականի ԿԸՅ արժեքին:

խորհրդային հանրապետությունները, բացի ԵՄ անդամ **բայթյան հանրապետություններից** և **Թուրքիան**: Տարածաշրջանի 19 երկրների շարքում Հայաստանը Մակեդոնիայի հետ կիսում է 9-10-րդ տեղերը (2016թ. նա զբաղեցնում էր 10-րդ տեղը): Հայաստանը նախկին խորհրդային հանրապետություններից այժմ զիջում է **բայթյան հանրապետություններին** և **Վրաստանին**, որի ԿԸՀ 2017թ. համաթիվը հավասար է 56-ի (2016թ. 57-ի փոխարեն կամ նահանջ 1 միավորով), որը դարձյալ ամենաբարձրն է Արևելյան Եվրոպա-Կենտրոնական Ասիա տարածաշրջանում, և **Բելառուսին**, որի ԿԸՀ-ն 2017թ. նույնպես ունեցավ բարելավում (2016թ. 40-ից մինչև 44 2017թ.՝ կամ աճ 4 միավորով):

Ինչպես և նախորդ տարիներին, Հայաստանը, շարունակում է զիջել նաև **Թուրքիային** (40՝ 2016-ի 41-ի փոխարեն), որը շարունակում է գրանցել Եական նահանջ սկսած 2012-ից, երբ նրա ԿԸՀ արժեքը հավասար էր 49 միավորի: Հայաստանի մյուս երկու հարևանների՝ **Ադրբեջանի** և **Իրանի** 2017թ. ԿԸՀ համաթվերը 2016թ. համեմատ բարելավվել են 1-ական միավորով, հավասարվելով 31-ի **Ադրբեջանի** դեպքում (122-ից 129-րդ տեղեր) և 30-ի **Իրանի** դեպքում (130-ից 134-րդ տեղեր)՝ առայժմ զիջելով Հայաստանին: Բելառուսից բացի, ԵԱՏՄ անդամ մյուս երկրների ԿԸՀ արժեքները շարունակում են ավելի ցածր մնալ Հայաստանի ԿԸՀ արժեքից: Մասնավորապես, **Ռուսաստանի** ԿԸՀ արժեքը մնացել է 29 միավոր (135-ից 142-րդ տեղեր): Այս տարի նրան հավասարվել է **Ղրղզստանը**՝ առաջադիմելով 1 միավորով: **Ղազախստանի** ԿԸՀ արժեքը ավելացել է 2 միավորով՝ դառնալով 31 (122-ից 129-րդ տեղեր):